



A lokisetse Morena Sechaba se phethehileng. (Luka 1:17)

Tel: 28 350 466/ 62600983 (WhatsApp)

MOELETSI OA BASOTHO

PARARE DOMINO PLEBEM PERFECTAM



2

**Lekitla o
nka kano****Premier e
ikemele**

11

**THABA-TSEKA BANA B'A IKHULISA****Access Our Books on Akello Library!**Explore a wide range of our books anytime, anywhere.
Visit Akello Library today and start reading!

#ReadAnywhere #AkelloLibrary #ExploreMore

<https://library.akello.co/downloads>**Follow the link**

MOELETSI

Ebe e tla atleha temo?

Linaha tsa Afrika bongata ba tsona li hlaloso li sitoa ho hola moruong hobane li nonyetsoa ke tšebeliso e mpe ea lichelete tsa sechaba. Batho bao sechaba se ba tšepetseng ho alosa le ho sebelisa lichelete tsona ka nepo ba iphetotse litali phoofong; ba itjella ba iphomoletse ba bile ba na le bonnete ba hore ha se bobebe ba ka arabellang matjala a bona. Likomiti tsa Paramente tse lisitseng Tšebeliso sa Lichelete tsa Sechaba (SADCOPAC) li tšoeroe 'moka koa-no lapeng ho tla shebisana le ho khalema maemo ana. Likomiti li khothaletsa ho etsa mosebetsi oa tsona ka botšephehi le makhetha, li etse bonnete ba hore haeba ho na le maparamente a hlahellang bohlasoeng ba lichelete tsa sechaba a hlahisoa kapel'a Makhotla a Molao. Komiti ea Lesotho e lile ka khahello ea lisebelisoa ho etsa mosebetsi ka mokhoa o felletseng, leha ho le joalo, Motsamaisi oa Lipuisano Paramenteng o itse e lokela hore ebe e se e na le maao le maqiti a ho hlola qholotso eo. O boletse teng hobane ho sotlehang ke sechaba sena se itelang ho holisa naha ena se bile se ithophere. 'Moka oo re lakatsa hore ebe o atlehileng 'me likomiti tsohle ha li khutlela tšebetsong li khutle ka mafolofolo 'me li sebelise likeletso tsohle ka tsela e nepahetseng.

Ho shebahala ka mona ka Lilaleng thuto e haella haholo mabapi le litaba tsa bophelo kaha bacha haholo banana ba tlase lillemong ba ima. Mosebeletsi oa tsa Bophelong Metseng o bontšitse ho makala h'a hlokomela hore bongata ba bacha bo hlile ha bo tsebe letho ka litšebeliso tsa bophelo tseo bo lokelang hore ebe bo'a li tseba. Lekala la Bophelo thota e sa namme holimo koana, potlakang le thuse sechaba seo hobane kaofela re chaba sa khomo; ho lemala ha karolo e 'ngoe ke ho hlotsa ha pitsi ena. Le hoja sesosa se seholo sa bokhachane bona e le tlala e teng ka malapeng, moo bana ba ikhulisang hobane batsoali esale e ba makhloa Afrika Boroa ba sa romele chelete; ho ba le tsebo mabapi le litaba tsa bophelo ho ntse ho le bohlokoa haholo.

'Muso oa Lesotho o tšehelitse temo ka ho behella kathoko chelete e kaalo ka M200 Million Bankeng ea Poso ka morero oa ho khahlametsa lihoai; joalokaha e bile khoelehetso ea Tona-Kholo h'a kena pusong hore Naha ea Lesotho e ithahisetse 'me qetellong e rekisetse linaha tse ling e leng se tla thusa ho nyolla moruo. Selekane sena taba e thabisang haholo ke e tsoileng molomong oa Mookameli oa Banka ea bontšitseng a lebeletse ho bona bacha ba nka karolo haholo litabeng tsa temo. O supile ha tebello e le hore 40% ea bona e tla una molemo litabeng sena. Bacha ak'u ithokhobetseng haholo litabeng tsa temo le tlohele ho nahana hore mosebetsi ke ona oa liofising feela. Ho itšebetsa le hoja ho le liqholotso li ngata ho monate hobane motho o etsa se ratoang ke eena, o tseba le ho kenya meralo e mecha nako eohle. Thusang batsoali ba lona etsoe le'a bona lintho li fetohile, ho se ho hloka hahlelikele tse ncha ka lebaka la phetoho ea boemo ba leholimo. Ka boko ba lona bo ntseeng bo le bocha le tla tseba ho etsa lipatlisiso tse hlokalahalang; ho etsa boithuto mabapi le temo e ka tla arabela lithoko tsa ha joale.

Lekhotla la Matona le bile le boithahlobo bo bileng Seterekeng sa Mohale's Hoek, ho lekola tema ea 'muso ona o seng o entse nalane ea ho qeta lilemo tse tharo e le 'muso oa letsema. Boitekolo bona bo sheba haholo boitlamo le litšepiso tse entsoeng nakong eo ho neng ho qaloa tšebetso. Ke hona mona moo matona a tla tseba ho soaeana mehlare le ho thoholetsana moo ho entsoeng hantle. Ebe joale ho boela ho etsoa meralo e mecha ho ntšetsapele le ho kata likoti etsoe matsoho ho lutla a sebitsang.

Mokhethoa oa lebatooa la Mekaling o amohetse thomo ea ho ba setho sa Paramente ea Pan-African 'me o tla hlapantšoa ka la 3 khoeling e tlang selemong se holimo. O tšepisitse ho il'otsa bonnete ba hore Afrika e utloa lentsoe la Lesotho. O itse o il'o loanela har'a tse ling toka, bonngoe le Afrika e tsitsitseng. Empa tseo e leng tsa bohlokoa tse ka thusang Basotho ke tsona tsa Ntšetsopele ea Moshoelella (SDGs); ho felisa bofuma, thuto e ntle, tekano lipakeng tsa bong 'moho le khotso, toka le mekhatlo e matla. Tsamaea u il'o sebeletsa sechaba sa Basotho se u tšepetseng mosebetsi oo, 'me tsohle tseo u li buileng li phethahale e se ke ea ba puo ea molomo feela.

MOLIMO A BOLOKE LESOTHO LE BASOTHO

Lekitla o nka kano

Nthabeleng Seitlheko

Kopano ea Maparamente a Lekhotla la Puso ea Sechaba (DC) a thontse mokhethoa oa Mekaling ho ba setho sa Paramente ea Pan-African, ea tla hlapantšoa ka la 3 Pulungoana monongoaha.

Puisanong le Mokhethoa enoa ka mohala ka la 30 Mphalane monongoaha, o

lula le emela melao-theo ea puso ea sechaba ka sechaba, boikarabello le tšebeliso ho sechaba tseo e leng tataiso ea bophelo ba hae ba lipolotiki. A leboha ka pelo eohle batho ba sechaba sa Mekaling ka ho mo tšepa le ho mot šehetsa hobane tšebetso ea bona ke matla a hae a maholo.

A re o tla kena mosebetsing ona oa Afrika a ikemiselitse ho phahamisa le ho sireletsa karolo ea Lesotho ka ho tsepamisa maikutlo ho

mente ea Pan-African, ke lumela hore Afrika e lokele ho bua ka lentsoe le le leng mabapi le puseletso le toka." A rialo.

Sebakeng sa Lesotho sena se bolela ho buella puseletso le matšelisano a loketseng sebakeng sa liketso tsa bokolone, ho kenyeletsoa ho amohua ha libaka tsa Basotho le litlamorao tsa moruo tse ntseng li bonahala kajeno. Ho tšehetsa toka ea mekitlane le khoebo e lekanang.

A re puseletso ke mohato oa ho khutlisetsa toka, seriti le teka-tekano tikolohong ea lefatše. Morero ona o lumellana le Agenda 2063 ea Mokhatlo oa Linaha tsa Afrika (AU) hammoho le li-



hlalositse hore ho thonngoa hona ke mosebetsi o moholo, kaha a lokela ho bona hore lentsoe la Lesotho le'a utloahala. O itse o amohela boemo ba ho ba Setho sa Paramente ea Pan-African (PAP) a emetse 'Muso oa Lesotho.

"Boemo bona ha se tlotla feela ho 'na, empa ke tšepo e kholo ea sechaba sa Lesotho hore lentsoe la naha ea rona le tla kenya letsoho ka tsela e bonahalang tabeng ea toka, bonngoe le ntšetsopele e tsitsitseng ea Afrika." Ke Lekitla eo.

O itse o lebisela teboho e kholo ho DC tlas'a boetapele bo matla ba Mathibeli Mokhotu. A re lekhotla la habo le

puso e ntle le boikarabello, e thehiloeng ponahalang, litokelo tsa botho le puso ea molao, matlafatso ea bacha le basali hobane ke bona bokamoso ba Afrika.

O boetse o tla shebana le litaba tsa Ntšetsopele ea Moshoelella (SDGs) haholo-holo SDG 1 (Ho felisa bofuma), SDG 4 (Thuto e ntle), SDG 5 (Tekano lipakeng tsa bong) le SDG 16 (Khotso, toka le mekhatlo e matla).

Nalane ea Lesotho, joaloka ea linaha tse ngata tsa Afrika e ntse e tšoareletsoe ke litlamorao tsa bokolone, ho amohua mobu, ho hleketsoa moruong le ho haneloa ntšetsopele. "Joaloka setho se motlotlo sa Para-

pehelo tsa Ntšetsopele ea Moshoelella.

A re h'a amohela boikarabelo bona, o etsa joalo ka tumelo le boitlamo ba hore karolo ea Lesotho ka hare ho Paramente ea Pan-African e tla tšoaoua ke botšephehi, bohlale le melao-theo. Paramente ena e lokela ho tsoelapele ho ba letsoalo, e sireletsa toka, bonngoe le boikarabello, 'me e netefatse hore phetoho ea Afrika ha e siee naha kapa moahi le ea mong morao. A re o tla etsa bonnete ba hore lentsoe la Lesotho le'a utloa, 'me le fetola bokamoso ba Afrika.

Lekitla o tla kema lieteng tsa 'Mamookho Phiri.

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

Editorial

Lesetsa Rakubutu

(+266) 6203 1949 / 58190670

EMAIL: editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

57 665 038/ 68 216 271

Tšelisio Thakholi

58 540 853/ 63 480 404

Production Desk: 'Mateele Liqa

40% e una molemo

Nthabeleng Seithleko

Ka sepheo sa ho kenya letsoho nt-lafalong ea lihoai Naha ea Lesotho e behelletse ka thoko chelete e kaalo M200 Million Bankeng ea Poso molomong oa ho khahlametsa lihoai. Litaba tsena li bile nakong eo Letona la Lichelete le Ntšetsopele ea Meralo Dr. Retšelisitsoe Matlanyane, la Temo, Kanetso ea Lijo le Phepo e Nepahetseng Mohlomphehi Thabo Mofosi 'moho le Mookameli oa Banka ea Poso Mokhachane Mopeli ba neng ba tekenela tumellano ea tšebetso, ka la 27 Mphalane monongoaha.

Tona-Khoho Ntsokoane Matekane o ipilelitse ho lihoai ho nka monyetla oa ho ikakhela ka matla temong. A re bacha le bona ba se sale morao, ba nke monyetla ona 'me ba kene temong molemong oa bona le naha ka kakaretso.

A re ho boetse ho na le theolelo ea 30% ho ba tla alima chelete eo ho se peheletso ea letho. A re morero ona ke oa lilemo tse hlan'no 'me le teng ha sehoai se

ka qeta mokitlane nakong ea lilemo tse tharo se ka khutla ho nka o mong.

Matekane o hopolitse sechaba ka nako oa seoa sa COVID-19 hore Naha ea Lesotho e ile ea tobana le bothata ba tlala. A re ke ka lebaka lena a ipiletsang ho lihoai ho ikakhela ka matla temong 'me sena se tla thusa ho fenyha tlala.

Letona la Lichelete le Ntšetsopele ea Meralo, Dr. Retšelisitsoe Matlanyane o itse Tona-Khoho o ile a etsa mohoo h'a kena pusong oa hore sechaba se lokela ho itlhahisetsa lijo ka bongata.

A supa hore tlhahiso ea lijo e phahameng e tla thusa ho fenyha tlala, 'me ke ka eona naha e ka tsebang ho nyolla moruo ka ho rekiset-sa linaha tse ling. A re tek-enelo ena e fana ka ntšetsopele ea se neng se ntse se le teng 'me lihoai li lokela ho nka monyetla ke hona.

O hlalositse hore le moo ebang lihoai li ka khibela banka e tla be e ntse e le malala-a-laotsoe ho li thusa kaha chelete eo ba e abetsoeng e tla be e ntse e behelletsoe ka thoko hore e sebeliso.

Letona la Temo,



Mohlomphehi Thabo Mofosi o itse Lekhotla la Matona le amohetse le ho ananela tšebetso ena ea lihoai, 'me naha e leetong kaha Tona-Khoho o thakhotse litaba tsa temo h'a kena pusong. A re morerong oa nako e fetileng lihoai li tšepahetse ke ka lebaka lena 'muso o seng leqe ho boela o li tšehetsa le lekhetlong lena.

Mofosi o itse tšepo ea bona ke hore tlhahiso ebe

holimo molemong oa ho fepa naha 'moho le ho rekiset-sa linaha tse ling. A re te-bello ke hore ba tla sebetsa ba thetsane ka mahetla le mafapha 'ohle a amehang. A re ba lokise mobu kaha ba fuoe thepa, ba ee masimong 'me bohle ba hlahise lijo e le hore ba tsebe ho iphepa.

Mookameli oa Banka ea Poso, Mokhachane Mopeli o itse banka ea habo e na le

lilemo tse 20 e thehiloe 'me sepheo se seng ke ho thusa Basotho. A re tekenelo ena ke ea bohloko joale 'muso o thusa lihoai 'me ke tšepo ea bona e le lihoai hore 'muso o tla 'ne o tsoelepele.

A re o lebelletse hore bacha ba kene morerong ona 'me ba une molemo. Le ha ho le joalo, o itse ke kakaretso ea bacha ba 40% e lebelletsoeng hore e tla una molemo.

Pension Fund e mema bacha

Nthabeleng Seithleko

Ele ho arabela litlhoko tsa litho tsa letlole la lipenchele tsa bahlanka le ho tla ka maano a macha, Letlole le tla tšoa'a 'moka oa khohola-koqo oa boithlahlobo, ka la 5 Pulungoana monongoaha.

Mookameli oa Letlole lena, 'Mamotlohi Mochebelele o hlaloaitse hore 'moka oa boraro ke moo boto e tla fana ka tlaleho ea tšebetso ho litho e le karolo ea boithlahlobo ba nako e fetileng ba tšebetso.

O re 'moka ona o kenyeletsa batho bohle hore ba be le lipuisano ba shebane le baji ba bona ba litšebeletso, ba thoholetsa kapa ho ba thakela ka malebela moo ba ntseng ba khibela mosebetsing oa bona. O re ho fihlela ha joale esale ba qalile mosebetsi ona ba sebelitse kathata ho bona hore ba aha setsoalle lipakeng tsa bona le baji ba bona le ho tla ka mekhoe e bonolo ea ho arabela litlhoko tsa bona haholo ka tšebeliso ea marang-rang.

"Re hloka baji ba

litšebeletso tsa rona ba thabileng, ba nang le tšepo le ho fumana litsiane tsa bona ka nako." Ke Mochebelele eo.

O ne a bua taba ena a ipapisitse le taba ea holieha ho fumana litsiane ha bahlanka, 'me a re mosebetsi oa bona ke ho lefa empa ntle le moo ba bile le lipuisano le makala ka ho fapakanana ho bona hore bahlanka ba lokisetsoa litaba tsa bona ka nako.

A re ba sebetsa kathata ho bona ho ba le ponaletso, ebile ho tla nolofalla litho tsa bona ho nka karolo 'mokeng ona ka marang-rang hore le bona e be karolo ea lietsa-hala.

O re esale ba qalile leeto lena la lipuisano le litho tsa bona litaba tsa mafosisa e ntse e ba pale ea maobane kaha ba beha pooaneng litaba tse tšoarehang tse reretsoeng ho fana ka tšepo ho baji ba litšebeletso tsa

bona.

H'a phethela o khothalelitse bacha ho nka karolo 'mokeng ona, kaha boholo e le bona ba sebetsang.

Ka lehlakoreng le leng, Thapelo Moabi ea ntseng a lokisetsoa ho fumana litsiane tse ileng tsa salla morao tsa motsoali oa hae ha amohe-lisoa ke letlole lena, o thoholelitse letlole ka tšebeliso ea lona e potlakileng ea marang-rang.

A re e ba bolokela lit-

siane tsa ho isa litokomane kaha ba se ba etsa lintho ka marang-rang. A khothaletsa hore ba koetlise batho ba seng ba le baholo hore ba tsebe hore ba ka fumana litšebeletso tsohle ba le malapeng. A bontša hore taba eo ke ntlafalo e tl'o thusa hore litšebeletso li tsamaee ka potlako le ho tliša tšepo.

Har'a litaba tse ling o thoholelitse letlole ka botšephehi ba hore ba etse tšalo-morao ea ho bona hore bona e le bajalefa ba fumana litsiane tse ileng tsa salla morao tsa batsoali ba bona bao e neng e le litichere.

"Hona ke botšephehi, ke ponaletso ebile letlole le bontša boikarabello ka ho feletseng." A rialo.

Letlole lena lena le litho tse 37, 000. Mohoo oa sele-mo sena ke "Moho katlehi-song ea bokamoso ba hau."



Tseba boemo ba

hau u

alafshoe



MOELETSI O TŠEHETSA BACHA



Tšeliso Thakholi

Kajeno bacha ba heso ba ratehang re na le e mong oa bacha ba ipabotseng haholo ka ho ba mohlalisi oa nama le ho etsa mefuta e fapaneng ea lihlahisoa tsa nama tse kang li-suasage le biltong supply. Empa ka ho khetholoha ke mohlalisi e moholo oa boroso le lihoapa tse lutlisang mathe ka monate. Eena ke Khotso Motlomelo ho hlaha Kampaning e bitsoang Makhuzos. O na le litsebo tse khethileng tsa ho hlahisa mefuta eohle ea lihlahisoa tsa nama. O hlahisa nama e ka jeoang malapeng, likhoebong, mafung le meketeng ka ho fapakana ha eona.

QALEHO

Ke qalile Kampani ea Makhuzos ka selemo sa 2019 ke ntse ke le moithuti Sekolong sa Lithuto tsa Mahlale le tsa Matsoho sa Lerotholi Polytechnic. Ka nako eo e ne e-s'o be le lebitso ho hang 'me ke ne ke ile ka khahlola ke lihlahisoa tsa motho e mong ea neng a etsa lihoapa ea neng a tsejoa haholo ka lebitso la bosoaso la Malaxen. Le 'na ka qala ha nyenyane joalo ho etsa lihoapa ke li rekisetsa baithuti ba Lerotholi, e le mokhoa o mong oa hore ke 'ne ke fumane mekhoha ea boipheliso. Taba ena e neng e ka e nyenyane kannete e ntsoaletse ntho e kholo hobane ke hona moo lerato la khoebo ena ea ka le ileng la qala hona teng.

E re kaha taba ena ea ho rekisa lihoapa ke e qalile ke ntse ke le sekolong, e itse ha ke se ke le selemong sa ho qetela ke

se ke ntse ke itokisetsa ho tla ngola lihlahlobo tsa mapomelo, ke ile ka emisa hanyenyane ka eona ho itokisetsa lihlahlobo ke tle ke tsebe ho tsepamisa maikutlo hantle lithutong.

H'A QETA HO NGOLA

Hang ha ke qeta ho ngola ke fumana lengolo la ka la Construction Managemant, kaha ha ke qala khoebo ena ke ne ke sa ela hloko haholo hore ke ntho ea bohlokoa eo nka phelang ka eona, ka be se ke il'o batla mosebetsi ka lebaka hore Morena Molimo o mphile talenta ea khoebo ea nama. Ke qetile nako e telele ke batla mosebetsi ke sa o fumane, empa ka qetella ke fumane oa konterata ka hona ka motseng ka Ha Mabote mathoasong a 2020, e leng nakong eane eo Covid-19 e neng e hlasitse haholo.

Ke ile ka sebetsa empa ka lebaka la maemo ao a neng a sa jese litheohelang, moseb-

etsi ha o'a ka oa tsoelapele ka moo ke neng ke hopotse ka teng. Ka hopola hore ke na le talenta e ikhethang ea ho hlahisa nama, 'me eare ha ke



qeta ho fumana moputso oa ho qetela moo konterakeng eo ke neng ke sebetsa ho eona, ka

tlohela mosebetsi ka khutlela ho oo ke neng ke ile ka qala ho ona oa ho rekisa lihoapa. Lekhetlong lena ka chelete eo ke neng ke ile ka e fumana ka e tlatsetse ka reka mechini e tla nthusa ho etsa lihlahisoa tsa nama habobebe tsa boleng bo phahameng.

Ke ile ka atleha haholo hobane ho ne ho e-na le bareki ba ntsebang, 'me hoseng ke ne ke ea seterateng sa Maseru ke rekisa lihlahisoa tsa ka tsa nama ea lihoapa.

KHOLO EA KHOEBO

Ho feta mona eaba khoebo ea ka e se e ntse e hola ho fihlela kajeno moo re seng re rekisa lihlahisoa tsa rona mabenkeleng a maholo, lishopong tse 'nyane tseo re seng re sebetsana le tsona, mabenkeleng a maholo moo ho tšeloang mafura a likoloi, mabenkele a rekisang lijo, matlo a mothamahane a li-Off Sale, li-Club, Guest Houses, batho ka bo-mong le batho bana ba rekisetsang lipatlong

re e-s'o atlehe ho tšelela kantle ho naha kaha qholotso e kholo eo re kopang 'muso oa habo rona ho re thusa ke ho fumana li-Standard tsa hore lihlahisoa tsa rona li kenyeletsoe mebarakeng ea linaha tse ling le ea lefatše.

LIHLAHISOA TSA MAKHUZOS

Rona re le Makhuzos rea itl-hahisetsa ka ho ruoa likolobe tseo e leng tsona tseo re li sebelisang. Ho feta mona re na le mekhatlo ea barui eo re leng litho tsa eona ba nang le liphoofole ka ho fapakana ha tsona. Hajoale re sebetsa ka khomo, khoho le kolobe ho etsa mefuta eohle ea lihlahisoa tsa nama. Empa ka ho khetholoha re bahlahisi ba boroso le lihoapa tse monate ka ho fetisisa le nama ka mefuta ea eona. Ho feta mona re rekisa mefuta eohle ea likarolo tsa nama tseo moreki a ka li batlang ka litheko tse tlase haholo.

KHOTHALETSO

Re khothaletsa bacha ho tisa haholo tlhahisong ea leruo la liphoofole le ho kena lithupelong tsa hore na liphoofole ka mefuta li baballoa le ho hlokomeloa joang e le hore li tle li tsebe ho ba atlehela. E le ho loantšha maemo ana a tlhokahalo ea mesebetsi ho bacha, re khothaletsa bacha ho tla ho Makhuzos ho tla reka nama ka litheko tse tlase, e be bona ba il'o ithekisetsa eona e le mokhoa o mong oa ho ba khahlametsa hore ba tsebe ho iphelisa. Re sebeletsa Ha Mabote, Mapeleng moo ho thoeng ke Bolula Restuarant, ke hona habo lihlahisoa tsa Makhuzos. Ba ka re Tšoara nomorong ea 5373 1525 ka linako tsohle, 'me mamati a butsoe re tla ba amohela ka liatla tse peli.



Tšebeliso ea chelete e baka bofuma-Makhalanyane

Nthabeleng Seithleko

Likomiti tsa Paramente tse shebaneng le Tšebeliso ea Lichelete tsa Sechaba (SADCOPAC) li thakelana ka malebela tšebeliso ea lichelete tsa sechaba le ho akofisa tšebetso ea likomiti tsena linaheng ka ho fapakana. 'Moka

tšebeliso e mpe ea lichelete tsa sechaba, 'me ke boikarabello ba Likomiti tse lisitseng Tšebeliso ea Lichelete tsa Sechaba, ho nka likhato tsa molao khahlanong le bohle ba ithuhisang ka lisebelisoa tsa sechaba.

A re komiti ena e lla ka tlhokahalo ea lisebelisoa ho phetha mosebetsi oa eona ka mafolofolo le hore likhothaletso tseo e fanang ka tsona ha li phethahatsoe. Le ha hole joalo o itse ke boikarabello ba eona

hetseng, 'me a leboha mokhatlo oa SADCOPAC le mafapha 'ohle a kentseng letsoho katlehisong ea 'moka ona ka le reng o na le tumello e feletseng ea hore o tlii'o tliša phetoho tšebetsong ea Komiti e lisitseng Tšebeliso ea Lichelete tsa Sechaba Lesotho (PAC) esita le linaheng tsa Afrika ka kakaretso.

Molula-Setulo Mokhatlong oa SADCOPAC, Warren Mwambazi o hlalositse hore mokhatlo

phelang ka boiketlo.

A ipiletsa ho boemeli ba linaha tsohle tse teng kahar'a mokhatlo ho lula bo thakelana ka malebela esita le ho arolelana liqholotso tseo bo kopanang le tsona tšebetsong le mekhoha e nepahetseng ea ho li rarolla kaha sena se tla thusa haholo toantšong ea bobolu.

Moemeli oa Mokhatlo oa Machaba a Kopaneng Lesotho, Amanda Mukwashi o bontšitse hore naha e nang le komiti e

A tiisa boikemisetso ba Me-khatlo ea UN le UNDP ho thusa maparamente e ka ba ka likeletso litabeng tsa ntlafatso ea maano kapa lithuso tsa mofuta ofe kapa ofe tseo ba ka li hlohang ho akofisa ponaleto le ho kenyeletsa sechaba litabeng tsohle tse reretsoeng ho ntlafatsa bosebeletsi ba sechaba.

Molula-Setulo oa Balula-Setulo ba Likomiti tsa Paramente, Mokhothu Makhalanyane ka ho tšoana le eena o bontšitse bohlokoa ba tšebeliso e nepahetseng ea lichelete tsa sechaba ka le reng linaha tse ngata tsa Afrika li teteбетse kahar'a bofuma ka lebaka la boikhabo ba maparamente.

A re Lesotho ke naha e tsebahalang ka ho ba le metsi a mangata a bileng a hloekileng empa karolo e kholo haholo ea sechaba sa Basotho e ntse e phela ka metsi a sa hloekang. A re ba bang b'a sokola, feela naha ea habo bona e tseba ho fepela le linaheng tse ling 'me sena ke sesupo sa tšebeliso e mpe ea lisebelisoa tsa sechaba.

A re bana ba bangata ba lutse malapeng ha ba kene sekolo ka lebaka la bohloki, ha ba bang ba baahi ba naha ena ba sitoa ho fumana litlhare ka tsela e nepahetseng ke bosieo ba litsela ka lebaka la tšebeliso e mpe ea lichelete tsa sechaba.

H'a tsoelapele o bontšitse hore ke boikarabello ba likomiti tse lisitseng tšebeliso ea lichelete tsa sechaba ho sebetsa kathata ho bona hore maparamente a nkileng karolo tšebeliso e mpe ea lichelete tsa sechaba a behoa kapel'a makhotla e le hore ba li khutlise.

A re 'muso o nang le ponaleto o tlahelela sechaba likatleho tseo o seng o li fihleletse le ho beha baahi sehlohlolong ka tsela eo lichelete li sebelisoang ka eona.

A ipiletsa ho PAC ho netefatsa hore malebela ao ba tlang ho a arolelana kopanong ena b'a sebelisa molemong oa sechaba.

Likomiti tse lisitseng tšebeliso ea lichelete tsa sechaba tsa linaha tsa SADC tse bileng 'mokeng ona li kenyeletsa Naha ea Afrika Boroa, Zimbabwe, Botswana le Eswatini 'moho le karolo ea maparamente a Lesotho pusong le a bohanyetsi.



ona o thakhotsoe ka la 27 Mphalane monongoha.

Motsamaisi oa Lipuisano Paramenteng, Mohlomphehi Tlohang Sekhamane o bontšitse hore kopano ena e tšoaea boikitlaetso ba naha ea Lesotho, mabapi le ho netefatsa hore lichelete tsa sechaba li tsoela Basotho le naha ka kakaretso molemo.

A re ke boikarabello ba maparamente ho sebelisa lichelete tsa sechaba ka tsela e nepahetseng e bileng e na le ponaleto kaha sechaba se ba tšepetse ho etsa mosebetsi o joalo ka boitelo: molemong oa ntlafatso le kholiso ea moruo.

A re maparamente a tšepetsoe hape ho fetisa melao le maano a thibelang bobolu le

ho leka maoa a mang haeba a ntseng a le tšebetsong a sa e thuse ho phetha mosebetsi oa eona oa ho beha ba molato kapel'a makhotla.

A re hangata maparamente a ba leqe ho fetisa likhothaletso tse thibelang tšebeliso e mpe ea lichelete tsa sechaba hobane e le bona ba li sebelisang hampe, 'me hafeela likomiti tse lisitseng tšebeliso ea lichelete tsa sechaba li sa nke likhato tse matla ho thibela liketso tse joalo; li sa natse lesisitho la maparamente ho kenya likhothaletso tsa tsona tšebetsong, linaha tsa Afrika li tla lula li futsanehile.

H'a phethela o tiisitse boitlamo ba Naha ea Lesotho ho bona hore lichelete tsa sechaba li sebelisoa ka tsela e nepa-

ona o thehiloe ka selemo sa 2003 ho thibela bobolu le tšebeliso e mpe ea lichelete tsa sechaba, 'me ke lekhetlo la pele 'moka ona o tšoareloa kahar'a Naha ea Lesotho.

A re a mang a maano a mokhatlo ona ke ho fana ka lithupelo ho likomiti tse lisitseng tšebeliso ea lichelete tsa sechaba ho matlafatsa litho ho ba le mahlale a ho atamela litaba tse amang tšebeliso ea lisebelisoa le lichelete tsa sechaba.

A re ba se ba fane ka thupelo linaheng tse ngata haholo, 'me taba-tabelo ea bona ke ho bona linaha tsohle kahar'a mokhatlo ona li fumane thupelo molemong oa bophelo bo botle ba baahi hobane ke ka ponaleto le tšebeliso e nepahetseng ea lichelete feela sechaba se ka

lisitseng tšebeliso ea lichelete tsa sechaba ke e hlomphang Litokelo tsa Mantlha tsa Botho.

A re komiti ena e lokela ho sebetsa kathata ho bona hore 'muso o isa litšebeletso sechabeng, tse kenyeletsang khaho ea litsela, phano ea litšebeletso tsa bophelo tse nepahetseng le ho sireletsa basali le bana khahlanong le tthekefetso.

A re ke boikarabello ba maparamente le 'muso ka kakaretso ho fetisa maano a ka thusang sechaba ho fenyha qholotso ea phetoho ea boemo ba leholimo le ho kenya Lipehelo tsa Ntšetsopele ea mo-shoella (SDGs) tšebetsong, 'me ke ka bolisa bo hloahloa ba PAC feela tsena tsohle li ka phethahalang.

Thaba-Tseka bana b'a ikhulisa

Nthabeleng Seithleko

Mookameli-Kakaretso oa Litšebeletso tsa Bophelo, Lekaleng la Bophelo, Dr. Makhoase Ranyali o re Setereke sa Thaba-Tseka se ithomme pele ka bokhachane ba bana ba tlaase lilemong. Litaba tsena o li boletse puisanong le Koranta ka la 28 Mphalane monongoaha.

O re sesosa sa taba ena ba fumane hore ke ho ikhulisa ha bana bao batsoali ba bona ba ile mesebetsing, ho boetse ho nkoa maeto a matelele ho fihla litšebeletsong tsa bophelo kaha litsi li qaqolohane. O re ntle le taba ena setereke seo se hlahella har'a tse ling tse hlohang metsi haholo nakong ea komello.

O re sechaba se ebe se qetelle se ba le mafu ka lebaka la metsi a sa hloekang ka hoo lefapha la habo le la tikoloho a tsoere kathata ho bona hore a tla anetsa thuto sebakeng seo. A bontša hore ho na le 8% ea basali ba ntseng ba pepela malapeng le hoja Lekala la Bophelo le tsoere ka matla ho bona hore litaba tsena li ea feela.

Ho hlola taba ena, o re ba ikelelitse ho eketsa marontabole moo bakhachane ba tla lula hona teng, ho emela nako ea bona ea ho pepa. O re ba bang ba sitoa ho fihla libakeng tse joalo ka lebaka la maemo a leholimo joaloka lipula, lehloa le ho

tlala ha linoka.

H'a phethela o ipilelitse ho sechaba ho ea litsing ho hlahlobela mafu pele ba kula e le ho thibela hore qetellong 'muso o se ke oa eba le litšenyehelo tse ngata sebakeng sa ho oka mafu.

Ho sa le joalo, 'Musi oa Setereke sa Thaba-Tseka, Tlali Mphafi o hlalositse hore setereke sa habo se tobane le liqholotso tse 'maloa tse kenyeletsang tlhokahalo ea litsela le ho fihleleha ha bonolo ha Litsi tsa Bophelo eleng se etsang hore batho ba bang ba 'ne ba pepele malapeng.

A tsoelapele hore tlhokahalo ea metsi Litsing tsa Bophelo e amme mesebetsi e etsoang litsing hobane bakhachane ba lokela ho ikhella metsi hore ba tle ba pepisoe. O re komello ke qholotso e kholo hobane mehloli ea bona ea metsi e'a fokola.

A tiisa hore ho ima ha bana ba tlaase lilemong ke taba e teng 'me ba ntse ba sebetsana le eona ka ho etela likolo ho fana ka thuto 'moho metseng ka lipitso. A re bothata bo bong tabeng ena ke ba bana ba holang ba ikhulisa malapeng ebe qetellong bophelo ba bona bo'a ameha hobane ba bang ba qetella ba kena litabeng tseo ba susumetsoa ke tlala le ho hlokomela ba bang.

E mong oa baroetsana ba angoeng ke boemo bona, eo koranta e nang le mabitso a hae ea lilemo li 15, o hlalositse hore o utloa bophelo ba hae bo le boima hobane e bile moimana ka lebaka la ho hloka motho ea

ba hlokomelang kaha batsoali ba phela Afrika Boroa ba sa romelle litsiane hore ba phele.

A re ba li romelola kamor'a nako e telele ba se ba hloka seo ba se jang, 'me e bohloko ke hore motsoali oa bona o ile a tsoaroa naheng eo hobane bukana ea hae ea ho eta e ne e jele matsatsi.

"Ke hlokomela bana b'eso ba babeli, ha ba ile ba ja sekolong ke lokela ho bona hore mantsiboea b'a ja ebe ke tla ke fuoe lijo sekolong." Ke moroetsana eo.

O re ka matsatsi a mang haholo mafelo a beke e ba bothata, hoo a ileng a iphumana a kena likamanong tsa lerato le motho ea ka ba hlokomelang. A re o imetsoe leha a ntse a tsoelapele ka sekolo empa o utloa a senyehetsoe ke nako.

E mong oa basebeletsi ba tsa bophelo motseng Thaba-Tseka Phomolong, 'Mareabetsoe Ntilane o hlalositse hore ba kopana le bothata ba bacha ba hlohang tsebo ka litšebeletso tseo ba ka li fumanang Litsing tsa Bophelo hore ba sireletsehe. O re ka lebaka la ho hlokomela ho ata ha bokhachane libakeng tse 'maloa ba bokella bacha ho ba thakela ka malebela le ho bona hore bao ba fumanathuto ea moshoelella.

O supile hore boholo ba bana ba tloha metseng e hole ba ea teropong haufi le likolo ebe ke hona moo ba qalellang ba ikhulisa hobane ba phela ba le bang. O re ba tsoere ka thata ho anetsa thuto ho bacha le ho ba khotlaletsa ho ea litsing.

Lekhotla la Matona le'a itekola



Nthabeleng Seithleko

Ele ho ithahloba le ho hetla morao tšebetso e seng e fihletsoe ke 'muso o etelletsoeng pele ke Mohlomphehi Samuel Ntsokoane Matekane, Lekhotla la Matona le tsoere kopano, moo le tšohlang litaba tsa khatelopele e fihletsoeng ho tloha o bile litulong ka selemo sa 2022. Tsena li bile Seterekeng sa Mohale 's Hoek ka la 28 Mphalane monongoaha.

H'a bula ka molao kopano ena, Motlatsi oa Tona-Kholo Justice Nthomeng Majara o hlalositse hore kopano ena e tlii'o hlahloba likatleho tseo 'muso o li fihletseng nakong ena ea lilemo tse tharo. A re ba bile ba ketele katleho ea ho fihlela lilemo tse fetang bobeli e le 'muso oa kopanelo esale Naha ea Lesotho e qala ho kena ho eona ho tloha ka selemo sa 2012.

A re ba tile kopanong ena ho tla ikhutsa le hona ho ithahloba hore litšepiso tseo 'muso o ileng oa li nka nakong eo o amohelang lesokoana o se o le ha kae ka tsona. O boetse a hlalosa hore ke ka kopano ena ba tlii'o thusana e le matona ho sebelisana 'moho ho fihlela toro ea Tona-Kholo e leng ho kholla Naha ea Lesotho bofumeng.

A bontša hore har'a boitlamo bo ka sehloohong ba shebane le temo e le eona ea mantlha eo ba lokelang ho bona hore e ba le leseli, kaha sena se tla thusa hore Basotho ba ithahisetse ho se tšitiso ea letho.

Leha ho le joalo, o itse hore e be ba kopane tjena ba se ba fetile nako e bohareng ba lilemo tse hlano tsa puso, hoa lokeleha hore ba ithahlobe hore na ba ntse ba saletse morao

hokae le likatleho tseo ba seng ba li fihletse.

A re ha ba kopane ba shebisana moo ba ntseng ba khibela teng tabeng ea ho isa litšebeletso sechabeng tseo kamoso ba tla bona mapotulo a puso e litulong, "re tla tseba ho thusana hore re fihlele moo re lakatsang hore ebe re fihlele ha nako ea lilemo tse hlano e fela." A rialo.

Letona la Liphatlalatso, Likhokahanyo, Mahlale, Tšebeliso ea Mahlale le Boqapi, Mohlomphehi Nthathi Moorosi o itse ba khotetse haholo ke kopano ena kaha e tla ba tataisa ho sebeletsa sechaba ka tsoanelo.

A re ba motlotlo haholo hore ebe Tona-Kholo o khotalelitse matona ho tsoara kopano ena kaha e le moo ba tlii'o thakelana ka malebela a ho atlehisa merero ea makala ao ba a eteletseng pele. A re ba labalabela hore kamor'a kopano ena matona a khutle a e-na le moea oa tšebeliso 'moho, bonngoe le kopano.

O bontšitse hore ba na le tšepo e kholo ea hore ba tla fihlela leano la ho isa litšebeletso sechabeng, ba ntse ba ipapisitse le liphelelo tsa ntlafatso ea moshoelella.

H'a phethela o hlalositse hore kamor'a kopano ena ba tla kopana le Bangoli ba Baholo ba Makala ho arolelana le bona liqeto tse fihletsoeng tse tla sebetsa ho ea pele nakong ena e setseng.

Lefu la **MOHLOPHEHI LOLOANE**. Mofu o hlokaletse ka la **07.09.2025** 'me a bolokeloa motseng oa **Ha Mphuthela** Lebatooeng la **Hloahloeng** ka la **04.10.2025**. Ho tsebisoa beng ka mofu le metsoalle. Tsebisoe etsoa ke **NTSONDO LOLOANE**.



Lesotho ha le re hlole-Tau

Tšeliso Thakholi

Letona Ofising ea Tona-Kholo Mhlomphehi Limpho Tau o thakhotse ka molao mokhatlo oa bacha o reretsoeng ho ntlafatsa bophelo ba bona le batho ba baholo, o bitsoang Lefisoana Empowerment Group(LEG) tšebeletsong e bileng Hlotse, Leribe ka la 25 Mphalane 2025.

Puong ea hae tšebeletsong ena, o thoholelitse mokhatlo ona o mocha ka hore tšebetso eo ba e etsang e aha boitšepo kahare ho bacha, e le hore ka bona naha ena ba ka e phelisa le ho e atlehisa. "Naha ena ha e-s'o re hlole, Lesotho lona bacha ha le e-s'o re hlole empa ho hloka hlahisa boikemisetso kaha lintho tse kholo tsa mantlha tse atlehisang naha, malapa le bophelo ba batho ke ho holisa khoebo kahare ho naha eo re phelang ho eona." A rialo.

Tau o hlalositse hore bohle re lokela ho tšoarana ka matsoho ho holisa 'maraka oa lehae, "feela re o holisa kahare ho naha, e be rona ba o fepelang ka lihlahisoa, 'me re sebelise chelete ho reka tse hlalositsoeng mona Lesotho."

A re Lefisoana le holisa bacha le batho ba baholo ka ho



ba hlomella ka litsebo, 'me bacha ba lokela hore ba tsitlallele ho bona hore ba ithehela likhoebo. A re boholo ba likhoebo tse nyenyane kahar'a naha li matsohong a bao e seng Basotho. Ka hona bacha ba lokela ho sebetsoa ka thata ho bona hore li ba matsohong a bona ho tloha kajeno.

A re boikhathatso bo nkoang ke 'muso oa habo ka Sebatso le e meng bo reretsoe hore li ahe boiphilele ba bacha ba hore ba hlahise tse hlokoang le ho ikemela likhoebong. A khotaletsa bacha ho tsitlallela ho itlhalisetsa le boqapi kaha taba ena e le bohlokoa haholo le ho ntlafatsa bophelo ba bacha le Basotho ka kakaretso.

A phethela ka ho ipiletsa ho bacha hore ba tsoare kathata ho sebelisa monyetla ona oo Lefisoana le ba fang ona, ho fetola bophelo ba bona le ba malapa a habo bona. "Naha ena ea Lesotho ke sa pheta bacha, ha e-s'o re hlole 'me pholoho ea eona e matsohong a rona. Ha re sebetsoeng kathata ho bona hore re lopolla bofumeng le ho e atlehisa ka ho ithehela mesebetsi e le hore melokong e tlang tlala le tlhokahalo ea mesebetsi e be pale ea maobane." Ke Tau eo.

Molula-Setulo oa Lefisoana, Monghali Lawrence Tsukutla o itse mokhatlo oa habo o tli'o shebana le likarolo tse tharo tsa sechaba e leng ho ntlafatsa

bacha, basali le banna empa hajoale ba qalile pele ka bacha ebe isao ba se ba tsoelapele ka karolo ea batho ba baholo.

A re boithutong ba bona ba hore na ba ka kenya letsoho joang litabeng tsa ho pholosa bacha le batho baholo liqhotsong tseo ba tobaneng le tsona tsa tlala le tlhokahalo ea mesebetsi, ba na le maano a kang a lipalali tse fupereng monate le boipheliso moo ba ka kenyang litsela tsa boipheliso kahare ho tsona le thuto ea ho ntša bacha linthong tse ka senyang bophelo ba bona. A re ba boetse ba hlophisitse manane-thuto a khoebo, e le ho ba hlomella ka litsebo ho bona hore b'a hola le molomong oa ho iphelisa.

Haele Mofumahali Lieketseng Hleoheng eo e leng Mokoetlisi le Motataisi ho tsa khoebo o bontšitse hore mosebetsi oa hae oa mantlha ke ho ruta bacha ka litaba tsa khoebo le hore na ha ba se ba ikopantse ka morero oa ho ithehela likhoebo ba lokela ho etsa joang. A re ba boetse ba ruta bacha mekhoha ea boikopanyo le ho ithehela lihlopha tsa boikopanyo. "Re ba hlahlela haholo ka litsebo mabapi le ho iketsetsa molao oa motheho oa boikopanyo ba bona."

A re taba ea bohlokoa haholo lithupelong tseo ba fanang ka tsona ho bacha ke tlhabollo le ho ba tataisa hore na ha ba se ba ikopantse ka morero oa ho qala likhoebo ba fumana lithuso tsa lichelete joang ho bafani. A leboha boteng ba mokhatlo o mocha oa Lefisoana, 'me a tliisa hore ba se ba tlii'o sebetsoa 'moho molemong oa bokamoso bo phethehileng ba bacha.



Tšenyoy ea thepa e beha sechaba tsietsing

Nthabeleng Seitlheko

Sechaba sa Roma se seboko ke tšenyoy ea thepa ea motlakase ea ho sakhoa ha lipalo tsa motlakase Tloutle. Litaba tsena li hlahetse puisanong le ba bang ba baahi ba sebaka sena, ka la 28 Mphalane monongoaha.

E le ho fihlella tharollo litabeng tsena Kampani ea Motlakase Lesotho (LEC) e anetsa thuto ka litaba tsa phepele ea motlakase, moo sechaba se neng se ruta le ka tšebeliso e nepahetseng ea motlakase, boipoleso le polokeho ea thepa ea motlakase.

Raliphatlatlatso LEC, Thamae Ngaka o hlalositse hore tšenyoy ea thepa ea motlakase ke ntho mpe e hlokanang ho tšoeleoa ka mathe hobane e khina ntšetsopele ea lintlafatso sechabeng.

Ho feta mona, o bontšitse hore ka tšebeliso 'moho ea LEC le sechaba bothata

bona bo ka fenngoa, 'me ho tla bebofatsa le ntlafatso ea marang-rang a phepele ea motlakase.

A re sechaba se lokela ho ba le boipoleso bo phethahetseng ho qoba tšenyoy



ea thepa 'moho le bosholu ba thepa ea motlakase. A re tšenyoy ea thepa ea motlakase e ka beha bophelo ba sechaba tlokotsing, ka hona e bolokehile ke pontšo ea hore sechaba le sona se

bolokehile.

O kopile sechaba ho sebelisana 'moho le LEC ho ntlafatsa tšireletso ea thepa ea motlakase le hona ho nena litlolo tsa molao ka bosholu le tšenyoy.

H'a phethela o lebohile sechaba ka menyenyetsi eo se fanang ka eona ha tšenyoy e se e etsahetse le hona ho etsa khoelehetso ea ho tsoelapele ho tlaleha litlolo tsa molao mabapi le tšenyoy ea thepa ea motlakase ho sepolesa se haufi 'moho le marena libakeng tseo se phelang ho tsona.

Morena oa Tloutle, Shale o hlalositse hore ke lipalo tse tharo tse sakhiloeng 'me seo se amme sechaba kaha tšenyoy eo e bakile ho khinoa ha tšebeliso ea motlakase malapeng.



O ipilelitse ho sechaba ho nena litlolo tsa molao kaha li ka senya bophelo ba bona le ba sechaba ka kakaretso, 'moho le tšenyoy e ka bakoang ke thepa e utsuoang kapa ho senngoa ea motlakase.

A re o kholisehile hore lisenyi tsa thepa ena ea motlakase ke batho ba nang le litsebo ka thepa ena hobane ha ho bonahale moo thepa e sentsoeng ho qhomme mollo e leng se ka etsahalang ha motho feela a se nang litsebo a ka senya thepa ea motlakase.

A re sechaba 'moho le mahokela ba sebetse 'moho le ho ba hlokolosi haholo litabeng tsa ho ipolesa kahar'a metse e le mokhoa oa ho sireletsa thepa ea motlakase khahlanong le litloli tsena tsa molao.

E mong oa baahi Ben Ntlhaba o itse tšenyoy ea thepa ea motlakase ke ntho e mpe kaha lisenyi tsa thepa ena li bakela batho bophelo bo bosula hobane ho nka nako hore LEC e fihle ho lokisa thepa e senyehileng.

A re ba tlii'o sebetsoa kathata ho thusana le mapolesa ho batlisisa hore na lisenyi tsena ke bo mang hore e tle e be mohlala ho ba bangata ba ka lakatsang ho etsa tlola ena ea molao.



Across


- 1 Mosali oa pele oa ho ba Letona la Lipapali. (9,6)
- 4 Letsoalloa la Mafeteng ebile e le letona la mehleng la thuto ka selemo sa 1993. (5,7)
- 5 Ntlo ea Bakhethoa ba Sechaba. (9)
- 6 Ntlo ea Mahosana. (6)
- 8 Mokhethoa oa lebatooa la Mosalemane (4,6)
- 9 Molao o Moholo ka ho fetisisa naheng. (5-4)
- 10 Tona-Kholo ea Lesotho ho tloha ka la 4 Mphalane 1966 ho isa 20 Pherekhong 1986. (6,8)
- 11 E bile karalo ea matona a mane a BCP a ileng a ts'oaroa ke Sesole sa Lesotho ka la 14 'mesa 1994. (8,5)

Down

- 2 Eo a ileng a bolaoa ke Sesole sa Lesotho ka la 14 'Mesa 1994, ebile e le Motlatsi oa Tona-Kholo pusong ea BCP. (9,6)
- 3 Tona-Kholo ea mehleng e hlahileng ka selemo sa 1918,

Seterekeng sa Berea. (4,8)

- 7 Fane ea Moahloli e Moholo oa mehleng ebile ke Motlatsi oa Tona-Kholo. (6)





TSA KEREKE

2024-2025 SELEMO C

MEEA EA BALUMELI BOHLE

Bohlale 3:1-9

Pesalema 23

Ba-Roma 5:5-11

Joannes 6:37-40



Khothatso

Kereke e lefatšeng le e leholimong

Bakriste lefatšeng ba keteka letsatsi la la 2 e le ho rapella meea ea balumeli bohle ba faletseng; ka hona kajeno ho tlotloa le ho hlomphe bohle ba ileng ho Morena. Letsatsi lena le tlang hang kamor'a la Bahalaleli Bohle le na le manoni a tradisone ea Bokriste haholo ho Makatholike, Maluther le Maanglican. Morero o moholo ke ho hlahloba le ho tataisa Mokriste litabeng tsa nalane, thuto-molimo le meetlo ea letsatsi lena. Ba phelang le ba shoeleng ba kopana 'moho thapelong, 'me sena se bontša ketso ea letho le ho holisa kopano lipakeng tsa balumeli.

Thuto ea Kereke e Katholike e ruta hore ho na le meea e fetang tlhoekisong pele e ka fetela leholimong 'me sebaka seo se bitsoa purgatory. Joale mona balumeli ba lefatšeng ba ka thusa ba faletseng ka lithapelo le mosebetsi e metle. Ketsahalo ena e tsoa Mangolong a Halalelang Bukeng ea Bo-Makabea e hlalosing lithapelo tse etsetsoang bafu. Lithapelo tsena ke tsona khubu ea litaba tsa letsatsi la kajeno. Ka ho rapella balumeli ba faletseng, ba phelang ba bontša lerato le tlhoho ea lefu.

Pele letsatsi lena le tla phatlalatsoa ka molao khale balumeli ba rapella bafu ba bona ho tlhoa mehleng ea khale, 'me baruti ba Kereke joaloka Tertulian le Cyprian ba hlalisa litaba tsena lingoloeng tsa bona. Ba ne ba lumela hore thapelo e ka thusa meea kamor'a lefu.

Ka selemo sa 998 AD Odilo ea Halalelang oa Cluny a phatlalatsa letsatsi la la 2 Pulungoana e le la sehopotso sa ho rapella meea e purgatoring. O ile a kopaya taba ena le ho thusa mafutsana 'me thuto ena e ile ea tsoala kholiso ea moea. Ketso ena e ile ea nama 'me ea fihlela libaka tse ling, eaba ka Ntoa ea Pele ea Lefatše Mopapa Benedict XV a hapella taba ena ka lebaka la batho ba ileng ba shoa ntoeng. Sena se bontša hore na moloko ka mong o ne o nka taba ena joang, leha ho le joalo taba e kholo mona ke tšepo, lerato le ho hopola ba faletseng lefatšeng la bokriste.

Lipalo tsa kajeno le tsona li ikamahanya haholo le morero oa letsatsi kaha li fana ka matšeliso le tšepiso; li tataisa balumeli leetong la mahloko ho ea tšepong. Polelo ka 'ngoe e ntsetsapele molaetsa oa e 'ngoe ho pakahatsa 'nete ea Morena. Lipalo tsena li qotsitsoe ho tse buang le ba lilelang beng ka bona, 'me li bontša tsotello ea Morena ho ba faletseng.

Libakeng tse ling mohla letsatsi lena ho eteloa mabitra 'me sena se thusa bana ho utloisisa hantle selekane sa bahalaleli, hape se ruta hore lera-to ha le felle bophelong empa le kamor'a lefu le teng. Baprista ba ka etsa Sehlabelo sa 'Missa hararo letsatsing la kajeno kaha e le thapelo e kholo e ka thusang meea e purgatoring ho kena Leholimong. Ho kena 'Missa ona oa ho rapella bafu ho bontša ho nka karolo morerong oa Kereke oa ho kopela bafu, ebile thapelo ena e kopanya ba phelang le ba shoeleng sehlabelong sa Kriste Jesu. Liketso tsena li thoba balumeli ba faletseng 'moho le ba ba lilelang.

Khoeli ea Pulungoana e khethiloe e le ea ho rapella meea ea balumeli bohle, ka hona selemo le selemo bakriste ba kopana thapelong ho rapella beng ka bona ba seng ba faletseng ka ho ba etsa Sehlabelo sa 'Missa, ho ba etela mabitteng le ho ba etsetsa lithapelo tse khethileng. Nako ena e matlafatsa likamano sechabeng, e boetse e fana ka matšeliso le tšepo ea tsoho ea bafu 'moho le bophelo bosafeleng.

Mosebetsi eo ea ho rapella ba faletseng e se felle khoeling ena empa e tsoelepele, khantšang mabone a lona, rapelang le ho etela ba faletseng. Ketso eo e tla le thusa ho ba haufi le baratua ba lona. Ho bakriste bophelo ha bo feliso bo'a fetola; ba thabela lefu hobane ke moo ba il'o kopana le 'Mopi oa bona thabong e sa feleng sekaneng sa bahalaleli.

Bahalaleli har'a Beke

3 Pulungoana Elerius

4 Pulungoana Vitalis

5 Pulungoana Sylvia

6 Pulungoana Winoc

7 Pulungoana Modanic

8 Pulungoana Moroc



O phomotse moreneng

Tšeliso Thakholi

Kereke e Katholike Naheng ea Uganda e oele ka phatla ka lefu la mobishopo eo e neng e le mokokotlo oa kholo le kholiso ea Kereke, thomong ea hae ea ho ba molisa oa Kereke Tikolohong ea Jinja, e leng Mohlomphehi

ncha le ho thonyetsoa ho ba Mobishopo-Mokhethoa oa Tikoloho e Kholo ea Tororo ka Hlakola 1994.

Bakriste ba Kereke e Katholike le sechaba sohle sa Morena Molimo se tsebile Mobishopo Wamika har'a makhabane a hae a mangata ka ho ba le moea oa bopapeli le lerato le tebileng ho Bashoela-Tumelo ba Halalelang ba Uganda.

Athe ba bang ba mohopola ka hloko le ka

selemo sa 2023, h'a ne a etelletse pele Sehlabelo se Halalelang sa 'Missa sa Bashoela-Tumelo Tikolohong ea Namugongo moo a tlehoang ke ACI Afrika a ne a re: "Le loannne ntoea e matla ea tumelo lona bahlanka ba Molimo, 'me e se e ka Morena Molimo a ka tšelisa malapa ohle a habo lona le Kereke ea hae."

Re ea khatisona lepatso li e-s'o phatlalatsoe. Moea oa hae o pho-



Charles Martin Wamika ea hlokaletseng ka la 22 Mphalane 2025 a le lilemo li 72.

Ho ea ka phatlalatso e ntšitsoeng ke Koranta ea Kereke e Katholike ACI Afrika Mohlanka enoa oa Morena Molimo o ne a hloesetsoe mokhahlelong oa Boprista bo Halalelang, Tikolohong e Kholo ea Tororo Naheng ea Uganda ka Loetse 1979 a le lilemo li 26, e ntse e le ntsetsopele ea ho phetha thomo ea hae ea ho phatlalatsa molaetsa o molemo sechabeng sa Morena Molimo.

O sebelitse Tikolohong ea Jinja ka moo a ileng a ipabola haholo ka ho ba le makhabane le lineo tse ngata tsa ho holisa Kereke ea Morena Molimo, ho fihlela a fuoa thomo e

hlomphe e kholo ka letsatsi la sehopotso sa Bashoela-Tumelo ka

mole ka khotso 'musong oa Molimo.

-ACI Afrika-

THAPELO EA JUBILEE



Ntate ea Maholimong
Ak'u etse rea u rapela hore tumelo eo u re fileng eona
Ka Mor'a hau ebile e le ngoan'abo rona Jesu Kriste,
'moho le mollo oa lerato ka lipelong tsa rona
Mollo o tlišoang ke khantšetso ea Moea o Halalelang
li ke li tsosolose tšepo e lehlohonolo ea ho tla ha 'Muso ua hau.
Mohau ua hau o ke o re fetole basebetsi ba mafolofolo tšimong ea hau,
Basebetsi ba jalang peo ea molaetsa o molemo oa Evangelii.
E le hore peo eona eo, e hole ka botebo kahar'a batho bohle le kahar'a tlhohleho eohle, e fihlise ka ho phethahala tebello ea ho tla ha Leholimo le lecha
Le Lefatše le lecha.
Moo kamor'a hore matla oohle a bobae a feliso, tlotla ea hau e tlang ho bonahatsoa e khanya kabosafeleng.
Ka mohau ua hau grasía ea Jubilee ena e ke e tsosolose kahar'a rona takatso
Ea ho nka leeto la tšepo le taba-tabelo ea ho fihlela Letlotlo la Leholimo.
Hape mohau ona oo, o ke o atise o be o ngatafatse thabo le khotso tsa Mopholosi oa rona lefatšeng lohle.
Joale letlotlo le thoriso li ke li isoe ho uena Morena Molimo oa rona
Ea Halalelang 'me ea Tlotlehlang kamehla le mehla.

Amen.

O tšepisa ho ba kahar'a Top 4

Tšeliso Thakholi

Sehlopha sa Bolo ea Mao-to sa Mahlaseli se matlafalitse maemo a sona lokong ea A Division ka ho bokeletsa lintlha-kholo tse 'ne kamor'a ho hlola Swallows ka 2-1 papaling e neng e bapalloa habo eona Mazenod ka la 26 Mphalane monongoaha kapel'a batšehetsi ba eona ba neng ba khobokane ka bongata ho tla boha papali ena.

Swallows e hlile ea tsohella ka letanteng ka ho hlaba ntlha ea pele ka leo-to la Setho Seleso karolong ea pele ea papali empa Mahlaseli ea khutla ka matla a maholo ea lekanya lintlha ka Sekonyela Makhobalo. Ho feta mona ho ile ha eba boima haholo ho Swallows e ileng ea hlaba ntlha pele ho li eketsa ho fihlela li ea khefutsong.

Ha li khutla karolong ea bobeli ho hlile ha bonahala hantle hore Swallows e ntse e bapala e se na bakoetlisi, ka ho imeloa ke papali le ho felloa ke maqiti a ho eketsa



lintlha, ho fihlela Bokang Ntepane oa Mahlaseli a hlaba ntlha ea bobeli eba ho felile ke lehlohonolo. Bakoetlisi ba Swallows ba ne ba ituletse letšoeleng joalo-ka batho bohle ba bohile papali ena.

Karolong ea bobeli ea papali Mahlaseli e bonahetse e se e fumane morethetho o ileng oa e sebeletsa hore

e qetelle e hlotse Swallows lekhetlo la pele mokhahlelong ona oa pele oa lipapali tsa A Division. Ka lebaka la bosieo ba bakoetlisi e ne e bonahala e hlola Swallows mekhahlelong eohle ka lebaleng. Swallows e se imetsoe ke mokhathala.

Mokoetlisi oa Mahlaseli Monghali Tšoanelo Fokase o itse lekhetlong lena sephi-

ri se ne se ipatetse Swallows kaha ba ile ba bapala papali ea setsoalle le bona pele liki e qala, 'me ba ba fa papali eo ka hore ba hloloe 5-0 kaha ho ne ho e-na le lintho tseo ba neng ba nt-seng ba li lokisa. "Ntho eo re tllileng ka eona hona joale e bile e fapakaneng le eo ba e boneng ha re ntse re bapala lipapali tsa setsoalle.

Re tllile re patile mohoasa hore ba se ke ba tseba hore na re tllil'o bapala joang. Ke bona boithhopho ba rona ba papali ea kajeno." A rialo.

A hlalosa hore leha ba qalile lipapali tsa bona tsa pele tse bulang selemo, ba sa bapala hantle kaha ba bapetse ka ho lekana ho e le 'ngoe ba lahlehetsoe ke tse peli, a tiisa hore ba tllil'o sebetsa ka thata hore ha mokhahlelo oa pele oa liki o fela ba be ba le kahar'a li-hlopha tse 'ne tse ka holimo lokong.

Ho sa le joalo, mafelong a beke a tsoa feta ka Liking e ka Boroa ea A Division li ile tsa bapala tjena: 05 United 1-0 Liponono, Quthing LMPS eo e ntseng e le eona bompoli ba Nedbank Cup ba ngoahola e shapile FC Summit ka 2-1, Qoaling Highlanders ea pola sehlopha se sa tsoa theohela li-hlopheng tsa A Division sa Ace Maseru ka 2-1. Haele ka Liking e ka Leboea ea A Division teng, Rangers 3-1 Butha-Buthe Warriors, Bua-sono United 2-1 Litšilo le Sehenehene 1-1 Happy Hearts.

Passion e tla hapa mojao-T Born

Tšeliso Thakholi

Sebini se tseba-halang haholo sa 'mino oa se-joale-joale oa Sotho Hip Hop Tumelo 'T Born' Seliane o tiisa hore setlabolane seo a seng a se phehile, se tllil'o hapa mojao oa ho ba e 'ngoe ea lipina tse tla ithoma pele ka ho ratoa moketeng oa hae o moholo oo a tllil'o o etsa o koalang selemo o tlang ho ba Lerotholi Polytechnic, Maseru ka la 6 Tšitoe 2025.

'Mino ona oa Sotho Hip Hop o ntseng o runya ka bongata bo boholo kahare ho naha o tumisitsoe haholo ke libini tsa Afrika Boroa le Lesotho, 'me li ithoka haholo ka puo ea habo tsona ea Sesotho leha ka nako e 'ngoe ba ntse ba tsoaka ka Sekhooa mona le mane ho natefisa le ho hohela bara-

ti ba fapakaneng ba 'mino ona.

Setlabolane sena seo a ileng a se lokolla ka khoe-li ea Tlhakubele selemong sena se bitsoang Passion, o re se tllil'o mo etsetsa mokete o moholo hobane se tla be se kenyeletsa le lipina tsohle tsa hae tse kang Son rise 1, Son rise 2, Molisana le Sotho Man. O re pina ena o e matlafalitse haholo ka makolulo a kenang pelong hamonate e le hore e natefele bohle ba tla e mamela. Pina ena e boetse e tllil'o kopanya lipina tsa hae tse bohale haholo tseo a seng a e-na le tsona.

Khalala ena ea 'mino e seng e e-na le boiphihlelo selika-likoeng sa 'mino e se e e-na le lipina tse ngata haholo tseo e ntseng e li ntša ka bonngoe tse kenyeletsang har'a tse ling tse monate haholo ke Mo-sotho, Monate oa Lenyalo, Tribute to the Loved Ones,

Restoration le Molisana. O bapatsa 'mino oa hae nako le nako libakeng tse fapakaneng tsa boithabiso kahar'a naha le lithaleng tse fapakaneng tsa 'mino kantle le kahare ho naha.

Karolo e 'ngoe ea balateli ba hae e lla ka hore o nka nako e telele ho hlahisa letlapa kaha a ntse a hlahisa lipina ka bonngoe ho fihlela hajoale. Empa o ba araba ka ho ba hlokomelisa hore molemong oa ho hlahisa 'mino oa boleng bo holimo, ho bohlokoa hore a nke nako e lekaneng ho pheha masutisa. "Le Li-ea-le-moea li lla ka hore 'mino o mongata o hlahisoang ke libini tsa lehae, boholo ba ona ha se oa boleng ba ho bapaloa ho tsona bakeng sa bamame-li." A rialo.

Ho feta moo, a supa hore o hlophisa le ho hlahisa 'mino oa boleng oo a tlang ho hatisa lipina kaofela mahlakore ohle a se a khot-

sofetse. T Born o qetella ka ho mema Basotho bohle ho tla ithabisa ka 'mino o math-emaloli le ho tla ba baahloli e le hore e tle e re h'a hatisa lipina tsena tsa hae 'moho ho etsa CD e le 'ngoe, bohle

ba be ba thabile ba bile ba khotsofetse. "Ka mokete ona o koalang selemo ke boetse ke tllil'o khutlisetsa sechabe ng hoba ke seo ke leng sona ka lebaka la tšehetso ea sona." Ke eena eo.



Premier League e ikemele-Nthunya

Tšeliso Thakholi

President e sa tsoa khethoa ea Mokhatlo o Tsamaisang Bolo ea Maoto Lesotho, (LeFA) Lijane Nthunya o re khopolo ea bona e le botsamaisi ba bolo ea maoto ke ho sebetsa kathata ho bona hore Premier League e'a ikemela, bakeng sa ho thusa ho ntlafat-sa papali ea bolo ea maoto. Tsena o li bo-letse 'mokeng oa pele oa hae le baphatlalat-si ba litaba nakong eo a neng a manolla e meng ea meralo ea hae ea tšebetso ea ho holisa le ho ntlafatsa bolo ea maoto kahare ho naha. 'Moka ona o bile Bambatha Sports Arena, Maseru ka la 29 Mphalane 2025.

Nthunya o boletse baphatlalatsi hore haeba re batla hore papali ea bolo ea maoto e tlohe boemong bona ba ho ba 'Semi-pro-fessional' ho ea boemong ba 'professional', bohle re lokela ho sebetsa kathata

hore Premier League e ike-mele, 'me tlasa eona e ntse e tsamaea le A Division. "Sena se tla re thusa re le Mokhatlo o Moholo hore re tle re tsebe ho tsepamisa maikutlo holim'a mosebetsi oa rona oa ho ntlafatsa pa-pali ho tloha ho B Division ho ea fihla tlase." A rialo.

A re nakong eo ba tla beng ba ntse ba lokisetsa hore Premier League e tle e qe-telle e ikemetse, o tlii'o lula fatše le litho tsa habo tsa Komiti e Kholo ho bona hore na ba ka etsa maoala afe ao ba ka thusang lihlopha tsa Premier le A Division ka mekhoha ea lithuso. "Lihlo-pha tsena li'a sokola haholo litabeng tse amanang le tsa-maiso ea tsona."

A re ntlha e 'ngoe eo ba loketseng ho tsepamisa maikutlo haholo holim'a eona ke ho ntlafatsa talenta ea bacha, ka ho matlafatsa manane a lithupelo a kang a TDS le Academy e Leribe. A re boemong ba lihlopha tsa B Division le C Division ba lakatsa ho tla sututsa ka matla hore litholisano li be teng boemong ba litereke, 'me li be le meputso e fapa-kaneng e le ho fana ka mo-



rolo ho bohle ba tlang ho li kenela.

"Ka lehlakoreng la papa-li ea basali re lokela ho tla thusana ho fetola mehopolo ea sechaba sa habo rona. Moetlong oa rona ha se ntho e tloaelehleng hore banana ba bapale bolo ea maoto. Ke mosebetsi oa rona ho sebetsa kathata hore re thuse batsoali ho utloisisa hore na ke hoban'eng hona joale ho se ho amohela hore ngoan'a ngoanana a bapale bolo." Ke President eo.

H'a tsoelapele, o bontši-tse hore ntlha e 'ngoe e kho-lo eo ba lokelang hore ba tšoare ho eona ke litholisano 'me bona e le botsamaisi bo boholo ba lokela ho etsa maoala a hore na ba khut-lisetsa joang litholisano tse kang tsa Top 4, Top 8 le tsa litereke, kapa tse ka nkang lihlopha tsohle ho tloha tlase

ho ea tsoa holimo. A re ba boetse ba tlii'o tebisa kepi haholo litabeng tsa lithupe-lo tse fapakaneng tse kang tsa ho koetlisa bakoetlisi le baletsaphala.

A tiisa hore tsena li ka fi-hleloa ha feela 'muso o ka lokisa Lebala la Setsoto. A re ba tlii'o ba le lipuisano le 'muso ho thusa ho bona hore ntlafatso ea Lebala la Setsoto e'a akofisoa. A etsa mohlala feela oa hore bon-yane haeba ho le thata ho mpe ho be le mabala a ma-holo a boemo ba machaba likarolong tse tharo tsa naha e leng ka Boroa, Leboea le Bohareng. A boela a re ba tlii'o sebetsana le litaba tsa lipapatso le botšehetsi.

Ntlha e kholo ea ho qetela eo a boletseng hore ba tlii'o sebetsana le eona ke khaho ea litsi tse tšoanang le tsa Maputsoe le Mohale's Hoek literekeng tse leshome tsa naha. A phethela ka hore ke boikarabello ba bona e le Komiti e Kholo ho bontša 'muso bohlokoa le boikara-bello ba ona ntlheng ea kha-ho ea mabala. "Ke boikara-bello ba 'muso ho bona hore mabala a boemo ba macha-ba a ba teng." Ke eena eo.

Tšeliso Thakholi

Sehlopha sa Bolo ea Maoto sa mokhahlelo o ka tlase oa A Division sa Black Five, se hlahletse nyeoe khahlanong le sa Mzamane Lekhotle-ng la Bolo ea Maoto la DISPROCO moo se llang ka hore se sebe-lisitse sebakali se sa ngolisoang ka molao, e leng Bokang Hlasoa papaling ea sona e bileng Lebaleng la Lipitso, Mokhotlong ka la 11 Mphalane monongoaha, 'me Nyeoe ena e ile ea tsoelapele Bambatha Tšita Sports Are-na, Maseru ka la 29 Mphalane 2025.

Le ha likateng tsa nyeoe ena e le hona li tlang ho phatlalatsoa hamorao, Black Five e kopa Lekhot-la hore Mzamane e nkeloe lintlha tse tharo le lintl-ha-kholo tse tharo ka tlolo eo ea molao e li fuoe. Ke hona papali ena moo Mza-manane e ne e se e hlotse

Black Five e hlahlela nyeoe



Black Five ka 2-0. Botsa-maisi ba Mzamane bo kop-ile Koranta hore bo tla fana ka maikutlo a bona hang ha kahlolo e se e fanoe, e le ho qoba ho kena-kenana le tse fuperoeng ke nyeoe.

Ho sa le joalo sehlopha sa Matlama se ahlotsoe ho lefa chelete e kaalo ka M20,000.00 ke Komiti ea Khalemo e Tsamaisang Li-hlopha tse Kholo ea PLMC kamor'a hore batšehetsi

ba sona ba silafatse se-riti sa bolo, sa LeFA, sa batšehetsi ba bang ba bolo le sa motšehetsi e moholo oa Liki e Kholo e leng Vodacom ka ho baka mefere-fere le ho lahela linthoana-nthoana ka lebaleng papaling ea bona ea makhaola-khang khah-lanong le Lioli ea Mohope oa Maluti Mountain Ce-ment Charity Cup e bileng mathoasong a khoeli ea

Mphalane monongoaha.

Ke hona papaling ena moo Lioli e ileng ea ikhapela mohope ona lekhetlo la bo-raro ka tatellano. Ho ea ka Raliphatlatlatso oa PLMC Monghali Moeketsi Ra-makatsa halofo ea kahlolo eo Matlama e neng e loke-la ho e lefa e fanyehiloa ka hore e lefe feela chelete e kaalo ka M10,000.00 pele matsatsi a 14 a fela. Se susumelelitseng hore ba

bebofatse kotlo eo ke hore sehlopha se ipoletse se le molato sa ba sa bontša se e-na le maikemisetso a ho nka likhato tse matla tsa khalemo khahlanong le ba-tho ba entseng liketso tse thunthetsang papali ena e ratoang haholo lefatšeng ea bolo ea maoto.

Puisanong le Phala ea Matlama, Monghali Them-ba Talane eena o re ba soa-bisitsoe haholo ke boitšoa-ro boo ba bo boneng ho ba bang ba batšehetsi ba bona papaling eo. A re ba se ba ikopela tšoarelo ho botsamaisi bohle ba bolo ea maoto, barati ba bolo le Basotho bohle ka liketso tsena tse fahlang mahlo a barati ba bolo. A tiisa hore ba tlii'o sebetsa kathata ho bona hore liketso tsa mo-futa ona li se hlole li ipheta. A re litaba ha li le teng ha li lokele ho sebetsoa ka lin-toa kaha li ke ke tsa tlisa tharollo ho hang. A supa batšehetsi ka monoana hore liketso tseo li se hlole li ipheta hape.

Prepare good People for The Lord

NOVALITES BLACK CLOTH COVER PRICE LIST

We cover your books with:

Novalites Black cloth and Plum Cloth



Re ka u kenyetša 'covers' tse
boletsong ka holimo li na le 'Title'
kapa lebitso la hau.
Re etele kapa oa re letsetsa ho
fumanana tlhaloso tse ling moo u
nang le lipotso.

Binding Services

 South African Department of Social Development		
Lifela tsa Linoto	M107.00	M357.00
Lifela tsa Mantsoe	M105.00	M355.00
Missale A,B,C	M107.00	M357.00
Combined Missale (A,B & C)	M225.00	M478.00
Misale le Mothusi	M112.00	M362.00
Thapelo ea Kereke	M112.00	M362.00
Bible	M112.00	M362.00
Lepato	M105.00	M355.00
Beke e Halalelang	M105.00	M355.00
Binelang Molimo	M105.00	M35.00
Litlhoahlofatsa	M200.00	M430.00

Plans Cloth covering

tailoring@mazenodprinting.co.ls

28 350 814 / 28 350 815

